

**UCAPAN PERDANA MENTERI MERANGKAP  
PRESIDEN UMNO DI MAJLIS PEMBUKAAN  
RASMI MESYUARAT AGUNG USNO YANG  
KETUJUH, DI KOTA KINABALU, SABAH  
PADA 1HB OGOS, 1972**

Saudara Pengerusi, Y.T.M. Tunku Abdul Rahman Putra Al-Haj dan Tun Sharifah Rodziah. Y.A.B. Tun Datu Haji Mustapha dan Toh Puan Hajjah Rahma, Ahli-ahli Majlis Tertinggi USNO, Para perwakilan dan saudara-saudara sekalian.

Saya bersyukur ke hadrat Allah Subhanahu Wataala kerana dapat bersama dengan saudara-saudara pagi ini dan di atas penghormatan tinggi yang diberi kepada saya untuk merasmikan Mesyuarat Agung USNO yang ke tujuh ini.

Hari ini adalah suatu hari yang berbahagia—hari jadi Y.A.B. Tun Mustapha. Bagi pihak sekalian yang hadir, saya mengucapkan selamat kepada Tun. Mudah-mudahan Allah cucurkan rahmatNya ke atas Tun dan dipanjangkanNya umur—sihat—dan kuat untuk terus memimpin Sabah dan USNO pada beberapa tahun yang akan datang.

Sesungguhnya saya merasa bertuah kerana diberi peluang berucap di Perhimpunan Ahli-ahli USNO yang begitu ramai dari seluruh negeri Sabah. Saya mengucapkan setinggi-tinggi terima-kasih kepada saudara kita Yang Dipertua USNO, Y.A.B. Tun Data Mustapha, kepada Ahli-ahli Majlis Tertinggi dan ahli-ahli USNO' di atas penghormatan ini dan atas keyakinan dan taat setia mereka yang tidak berbelah kepada Malaysia dan juga rasa kasih mesra serta semangat persaudaraan kepada UMNO dan kepada diri saya sendiri.

Semenjak saya memegang pimpinan UMNO baharu tiga kali sahaja saya mendapat penghormatan yang tinggi seperti ini iaitu merasmikan Mesyuarat Agung sebuah Parti Politik. Pertama kali, setelah mengambil alih jawatan Perdana Menteri daripada Y.T.M. Tunku, saya telah diberi penghormatan merasmikan Persidangan

Agung M C A yang pertama kali diadakan setelah Parlimen dipulihkan. Kali kedua ialah merasmikan Persidangan Agung UMNO yang ke dua puluh tiga buat kali pertamanya sebagai Presiden UMNO pada 24hb Jun yang lalu; dan ketiganya ialah hari ini.

Oleh yang demikian, saya menganggap ini adalah hari yang paling bersejarah pada diri saya khasnya, dan UMNO amnya, kerana penghormatan merasmikan Mesyuarat Agung sebuah Parti Politik yang begitu kuat, dinamis dan affluent seperti USNO ini. USNO adalah salah sebuah Parti Siasah yang ulung dalam negara kita sekarang dan saya berdoa muga-muga tempat utama dan mulia ini dapat dikekalkan selama-lamanya.

Saudara-saudara sekalian,

Majlis hari ini mempunyai erti yang sungguh besar dalam perkembangan politik dan pengukuhan negara kerana perhimpunan ini menjalinkan ikatan persaudaraan yang kuat, yang menjamin perpaduan dan kemesraan di kalangan rakyat Bumiputra dari Padang Besar di Perlis hinggalah ke Pulau Banggi di Sabah.

Di mana-mana juga kita berada, kita semua, sebagai rakyat Malaysia, hendaklah yakin dan merasakan diri kita sebagai anggota satu keluarga. Apa jua kesenangan yang dinikmati atau kesusahan yang dirasakan oleh Kuala Lumpur mestilah juga dirasakan di Kota Kinabalu, Kuching, Alor Star dan tempat-tempat lain, Persaudaraan dan perpaduan yang kukuh di kalangan rakyat sudah wujud dan menjadi sehati seperti kata pepatah: "Cubit paha kanan. paha kiri pun sakit juga".

Sebenarnya, perasaan persaudaraan dan perpaduan yang kukuh sudah pun ada, dan baiklah kita bersama-sama memupuk perasaan sayang dan taat kepada Negara atau semangat patriotism kita. Semangat persaudaraan, perpaduan dan patriotism yang telah dijalin dengan pembentukan Malaysia bertambah nyata kerana rakyat sedar sifat-sifat ini mestilah diperkuatkan lagi. Tanpa perasaan dan sifat-sifat tadi, adalah sukar bagi kita hendak mempertahankan keutuhan Negara.

Majlis kita ini tambah berseri kerana adanya bersama-sama kita pada hari ini, Y.T.M. Tunku Abdul Rahman, Bapa Malaysia. Sungguhpun beliau telah menarik diri dari medan politik, minat

dan interestnya kepada kita sentiasa teguh. Tunku masih kuat dan beliau sentiasa memberi perhatian yang berat kepada perjuangan kita dan kepada masa hadapan Malaysia.

Kepada beliau, kita semua menyatakan penghargaan yang tidak terhingga di atas jasa, pengorbanan dan pimpinan jujur yang tidak ada tolok banding yang beliau berikan kepada Negara. Saya sendiri banyak berhutang budi kepada Tunku. Saya berdoa kepada Allah mudah-mudahan Allah lanjutkan usia Tunku hidup dalam keadaan aman sentosa, penuh bahagia dan sihat walafiat.

Saudara-saudara sekalian,

Perhimpunan hari ini adalah satu perhimpunan yang agung yang pernah diadakan di Kota Kinabalu. Saya tidak ingat satu masa lain di mana begini ramai pemimpin-pemimpin Malaysia berhimpun, bertukar-tukar fikiran dan beramah mesra dengan rakyat di bawah bumbung yang sama.

Kita datang beramai-ramai menyertai suasana meriah Mesyuarat Agung Parti USNO yang ke tujuh ini dan kita berhimpun beramai-ramai merayakan ulang tahun yang ke sepuluh Parti USNO—Parti yang ulung dan yang tunggal di Sabah ini. Kita berkumpul di Kota Kinabalu kerana hendak melihat sendiri akan kejayaan dan kemajuan yang telah dicapai oleh rakyat dan Kerajaan Sabah di bawah pemimpin dinamis saudara kita, Tun Datu Mustapha.

Pada saat yang berbahagia ini, saya dengan sukacita, bagi pihak pemimpin-pemimpin dan ahli-ahli UMNO dan Perikatan seluruh Malaysia, mengucapkan setinggi-tinggi tahniah kepada USNO sempena hari ulangtahun yang kesepuluh. Begitu juga kepada saudara saya. Tun Datu Mustapha di atas pimpinannya yang cergas dan cemerlang serta penuh inspirasi dalam tempoh yang sama dan seterusnya kepada ahli-ahli USNO di atas perpaduan yang telah mereka capai sehingga Sabah dapat mewujudkan sebuah Kerajaan yang adil, kuat, dan stabil, dan rakyatnya dari berbilang bangsa hidup aman dan makmur dan bahagia.

Saudara-saudara sekalian,

Saya tidaklah hendak menghuraikan sejarah USNO kerana saya yakin saudara-saudara sendiri lebih mengetahuinya. Tetapi suka sah saya tegaskan di sini bahawa USNO lahir dari semangat kebangsaan rakyat Bumiputra Sabah dan perasaan cintakan kemerdekaan

melalui Malaysia. USNO tegak dengan gagah sekarang setelah melalui bermacam-macam dugaan, cabaran, dan ujian dari golongan-golongan yang tertentu, baik dari dalam mahu pun dari luar, tetapi syukur Alhamdulillah, semua dugaan dan cabaran itu telah dapat diatasi.

Kehadiran saudara-saudara ahli USNO begini ramai membuktikan dengan jelasnya akan kejayaan USNO dan saudara-saudara menjaga keutuhan dan perpaduan Parti dan juga kesediaan serta kesanggupan saudara-saudara menyambung perjuangan USNO, menjunjung tinggi prinsip-prinsip Rukunegara dan cita-cita Negara Malaysia yang kita kasihi.

Marilah kita bersama-sama bersyukur ke hadrat Allah Subhanahu wataala atas hidayahNya, memandu kita dalam segala usaha dan perjuangan Negara Malaysia, perjuangan Parti kita—Perikatan, UMNO dan USNO di masa-masa yang lampau dan sekarang jua. Berkat petunjukNya kita akan melihat kejayaan-kejayaan lagi pada masa akan datang. Oleh itu, bersama-samalah kita berikrar serta membaharui azam dan tekad untuk mencapai kejayaan yang lebih cemerlang dan berbakti kepada bangsa, negara, ugama dan Parti di masa-masa hadapan.

Saudara-saudara sekalian,

Ikatan tali persaudaraan dan ideologi antara UMNO dan USNO sudah lama terjalin. Hubungan di peringkat Parti, ahli-ahli perseorangan dan pemimpin-pemimpin tinggi sangatlah rapat. UMNO mendapat kerjasama yang baik dari USNO dan Yang Dipertuanya, Tun Datu Mustapha. Saya suka menegaskan pada hari ini bahawa UMNO sentiasa bersedia berkerjasama dengan USNO untuk mewujudkan perhubungan yang lebih erat lagi. UMNO menganggap USNO dan Parti Bumiputra/Pesaka di Sarawak sebagai "first cousins" atau saudara sepupunya kerana UMNO tidak mempunyai adik atau abang—tetapi ada "pupu" di Sabah dan Sarawak, serta sahabat-sahabat karib dan kawan—sahabat-sahabatnya ialah MCA dan MIC. Kawan-kawannya ialah SUPP, PPP dan Gerakan.

Saudara-saudara sekalian,

Saya rasa sudah kena tempatnya pada hari ini saya mengucapkan setinggi-tinggi tahniah dan penghargaan kepada bekas pemimpin-pemimpin dan ahli-ahli UPKO, khususnya kepada sahabat

saya, Tan Sri Mohd. Fuad Stephens, Dato Haji Ghani Gilong dan pemimpin-pemimpin yang lain, kerana dengan usaha dan pengorbanan mereka, pengukuhan negara dan perpaduan rakyat Bumiputera dapat dilaksanakan. Tan Sri Mohd. Fuad Stephens telah bersetuju membubarkan UPKO dan dengan itu semua ahli-ahli Bumiputera dapat berada dalam sebuah Parti sahaja iaitu USNO. Kejujuran dan pengorbanan Tan Sri Mohd. Fuad Stephens dan perjuangannya bagi menubuhkan Malaysia patutlah diingati di dalam sejarah Negeri Sabah. Langkah ini telah memperkuatkan perpaduan di kalangan rakyat Sabah.

Perpaduan ini membolehkan Kerajaan Sabah dan Kerajaan Pusat menumpukan sepenuh usaha dan tenaga kepada kemajuan dan pembangunan Sabah dan kebahagiaan rakyatnya tanpa menghabiskan banyak masa, tenaga dan fikiran percuma kerana berpolitik sama sendiri. Kerajaan Pusat dan Kerajaan Negeri Sabah semata-mata hendak memberikan rakyat Malaysia dari semua bangsa dan ugama satu pemerintahan yang cekap, bersih, jujur, kuat dan stabil serta taraf dan nilai-nilai hidup yang sesuai dengan tuntutan zaman, sebagai rakyat negara yang merdeka dan berdaulat.

USNO mempunyai cita-cita yang tinggi dan pemimpin agungnya, Tun Datu Mustapha, juga mempunyai cita-cita yang tinggi. Oleh kerana banyak lagi tugas-tugas penting yang belum kita laksanakan di Sabah dan di peringkat Negara, maka mustahaklah USNO terns diperkuatkan lagi dengan mengukuhkan jentera pentadbiran dan meningkatkan kegiatan politiknya. Segala tenaga, fikiran dan tenaga ahli-ahlinya—pemuda dan wanita hendaklah disalurkan kepada usaha-usaha yang benar-benar memberi munafaat kepada bangsa dan Negara.

Mana-mana Parti pun jika hendak maju dan hendak mengekalkan kedudukannya serta meluaskan pengaruhnya, mestilah bergerak menurut landasan-landasan yang ditentukan, mengikut dasar, peraturan dan berdisiplin.

Disiplin tidaklah bererti membatasi seseorang ahli, pemuda atau wanita untuk bertindak dan bersuara. Tetapi, ia hanya sekadar mengenakan aturan-aturan tertentu supaya tindakan seseorang itu disalurkan sesuai dengan dasar-dasar dan cita-cita perjuangan Parti dan negara bukan cita-cita seorang sahaja atau satu puak

sahaja. Dengan adanya disiplin yang teguh, segala tindakan akan dapat dilancarkan dengan licin yang akan menjamin kejayaannya.

Saudara-saudara sekalian,

Negeri Sabah sangat beruntung kerana mendapat pemimpinnya seorang nationalist tulin yang jujur dan dinamis seperti Tun Datu Mustapha. Beliau banyak mengorbankan tenaga, fikiran dan harta bendanya, untuk menegakkan USNO dan Kerajaan Perikatan di Sabah. Beliau telah banyak berjasa kepada bangsa, ugama dan tanahair; jasa beliau kepada negara tidaklah dapat ternilai. Hari ini bukanlah "Testimonial Day" untuk beliau tetapi tidaklah terlalu jika saya katakan Tun Datu Mustapha adalah seorang pejuang kebangsaan dan pemimpin politik yang tegas, berani, jujur dan taat setia, yang sukar bandingannya.

Kejayaan Sabah dan USNO hari ini adalah kejayaan beliau dan rakan-rakannya. Hari ini seluruh rakyat Bumiputra bersatu padu di bawah bendera USNO. Kaum Cina menerusi SCA dan Kaum India melalui SIC, juga memberikan sokongan yang penuh kepada beliau dan kepada Kerajaan yang dipimpinnya. Saya fikir sebaik-baik tanda penghormatan dan penghargaan yang dapat kita berikan kepadanya ialah bagi saudara-saudara mengukuhkan lagi perpaduan rakyat di Sabah dengan memberikan sokongan yang tidak berbelah bagi kepadanya.

Saudara-saudara sekalian.

Kerajaan Perikatan Sabah dan Pusat sedar betapa tingginya cita-cita dan hasrat rakyat kita yang berbilang bangsa berkehendakkan kemajuan dan kebahagiaan. Kita sedang menjalankan berbagai ikhtiar dengan seberapa daya untuk memperbaiki taraf hidup rakyat terutama sekali mereka yang tinggal di kawasan-kawasan yang mundur dan berjauhan. Proses memodenkan Negara dan bangsa akan berjalan dengan giatnya di bawah Rancangan Malaysia Kedua.

Perjuangan saudara-saudara di sini sama dengan perjuangan rakyat Bumiputra yang lain dalam Malaysia. Dalam sebarang perjuangan, saudara-saudara mempunyai sahabat di Malaysia Barat kerana UMNO menyokong perjuangan USNO. Kita telah berikrar akan sehidup semati dalam Malaysia dan tidak payahlah

lagi kita membaharui ikrar itu pagi ini kerana kita telahpun ber-sumpah dengan nama Allah atas "Commitment" kita bersama terhadap Negara Malaysia yang kita cintai ini.

Saudara-saudara,

Dengan perpaduan yang kukuh di kalangan rakyat Bumiputra, dan dengan kerjasama rakyat lain, kita akan mewujudkan satu bangsa Malaysia yang bersatu padu, yang gagah dan makmur. Negara kita akan menjadi sebuah Negara yang dihormati oleh semua kuasa di rantau kita ini khasnya dan di dunia amnya.

Saudara-saudara sekalian,

Kekuatan USNO sepertilah juga kekuatan UMNO terletak pada peranan kita memperjuangkan cita-cita dan hasrat rakyat. Dengan sebab itu, Ketua-ketua Parti dan ahli-ahlinya mestilah sentiasa berdamping dengan rakyat. Jika kita menyeleweng dari cita-cita itu, maka kita akan hilang akar umbi yang menjamin pertumbuhan Parti dan Kerajaan.

Dengan keinsafan ini, saya sudahi ucapan saya, sambil berdoa mudah-mudahan Allah Subhanahu wataala akan tunjukkan jalan yang benar bagi kita meneruskan tugas-tugas kita terhadap bangsa, ugama dan tanah-air. Kita bersyukur kepada Tuhan Yang Maha Esa kerana, selama dua puluh lima tahun bagi UMNO dan sepuluh tahun bagi USNO, mencururkan rahmatnya kepada Negara dan rakyat Malaysia dan kepada kita sekalian. Allah memberkati segala usaha kita.

Saya yakin dengan taat setia dan perpaduan yang terdapat di antara rakyat Malaysia dari berbilang kaum dan dengan kejujuran dan saling mengerti yang erat dari pemimpin-pemimpin di semua peringkat, Malaysia akan melihat zaman baru yang lebih cerah dan gilang-gemilang.

Dengan ini, saya dengan sukacitanya merasmikan Mesyuarat Agung USNO yang ketujuh ini dengan harapan dan doa semuga Mesyuarat ini akan berjaya sepenuh-penuhnya.

Sebelum saya duduk saya suka hendak menyampaikan tanda mata yang tidak sepertinya daripada UMNO kepada USNO sempena ulangtahunnya yang ke sepuluh dan doa serta harapan semuga USNO terus subur dan maju pada masa akan datang.



**Tun Abdul Razak bin Hussein kelihatan sedang menerima "Scroll" di Kongres Perubatan Malaysia-Singapura yang ke tujuh di Hospital Besar, Kuala Lumpur pada 4hb Ogos, 1972.**

**(Gambar The New Straits Times)**